

Basef Ifimba Pol Nanda'ef Fagi' Fagafe'ma Korini

Basef bandafi Pol nanda'effagi' fagafe'ma esis Korini

1:1-11 Pol nandabeten nanifela Goda esis

1:12-7:16 Pol na'ipasa basefa waf apa' Kris-
ten monda'afi faloma akafimi hiami apa'
mogofa'ami

8:1-9:15 Otamba esis sakolasemba ma sogaso'
esis Kristen kwahusi

10:1-12:21 Pol na'ipasa basefa waf ananifi
faloma akafimi nagame'ama maol Kraisi ea'
na'i Krais atona natopalopana dowaf nowa'
banagona

13:1-10 Basef solawaisafi

13:11-14 Basef akutaifi faloma dagala ananini

¹ Ae' Pol, God nandandepe aposel Krais Jisasi.
Ae' aloma owamapa Timoti wanda'ago basef
ifimba ma ipa' amam nematawa Godi pagape Ko-
rini pelomago amam nematawa hiasi Godi si'isi
sagape anamba hiagoma esis Grik sagapoma.*

² Ae' a'i God ahamapa ape'inai noloma Dembi-
nai Jisas Krais motopalopepa dowaf mowa' bana-
gaipago monda' opalef ipe'ilifi fepe awanelef.*

Pol nanifela Goda nagatopalopa anen

³ Apa' mondasa'ma agol Godi lu'wagol, anen
God ahama Dembinai ape'inai Jisas Krais.
Anen ahamapa ape'inai, kofagonama okom

* **1:1** 1 Ko 1:1,3 * **1:2** Ef 1:3; 1 Pi 1:3; Ro 15:5

magamagailapai nati apa' uwahipipa. Anen God nanda' opalef nimanilifi apa' hiapaii fagape sa'ombel. ⁴ Nimanimi hiami magatagamapai anen nanda'apa opalef fape awanelef. Ama dei' apa' ila ma monda' opalef epes isimba nimanimi mamimami mogatagamasi fegape awanelef si'i God nali' nagatopalopapa.* ⁵ Akafimi lu'wami Krais nali' nogofa'ami dei' apa' wapani mofa'am. Ea' na'amba atin opaf awanifi lu'wafi ananifi dei' faso'alepa.*

⁶ I'i dei' anis dais sogaso'afa nimanimi, amamba motopalopepa monda' opalef ipe'ilifi fepe sa'ombela atiasi God nokwahomepa waf awafi nofa'epa pigitanimai. I'i God nond'a' opalef afa'ilifi fegape sa'ombel, anen nond'a' opalef ipe'ilifi awanelef wapani ma pilutu banagepama pegefa' akafimi amambai si'i afa' ogofa'ami. ⁷ Afa' ogawa endilisi wa'i ipa' pigalutu banagepa. Dei' main, afa' ogawa ipa' apefa' akafimi palomafa ea' na'amba atin atiasi pefa' opalef awanilifi pelomafa wapani.*

⁸ Ipa' alipipai, afa' wa'i ipa' ata' pegawa nimanimi akafimi anis epes sagaso'afam gani itap apamba lu'upa Esiai. Akafimi amamba lu'wami a'owa' ea' mahagofa afa', mikila' banagami afa'imi. Ea' afa' ukup pandanda' pa'i endilisi atiasi a' oga'. ⁹ Wameme'ma nimanimi lu'wami ea' ogawa wa'i endilisi atis a' oga'. Apa' owa' amamba matagamafa ma afa' ina ukup pendanda'ma banagami afa'imi atom,

* ^{1:4} Sam 34:19; Sam 94:19 * ^{1:5} 2 Ko 4:15 * ^{1:7} Ap 19:23;
1 Ko 15:32

owa'atin. Afa' ukup pendapoma banagami Godi atom, amamba magasa'ma epes sagaga'ii.*
10 Esis saso'afa nimanimi lu'wami sanda'afa aofa endilisi sa'i sohafa oga', owa' God nofa'afa otanimai. Ea' atiasi notopalopafa wapani. Ukup afa'ipi banagep ohapifana endilisi ma atiasi nogatopalopafa ma anom nimanimi lu'wami wapani. **11** Ama dei' beten ipa'panda'mafani atin, nondamafas na'amba. Ea' God atiasi nogwa beten amam nematawa hiasi sanda'ani ma anennofalo'mafa nogatopalopafa dowaf. Ama atiasi amam nematawa hiasi ukup pegapoma afa' ma soganifela Goda hiahawes isimba anen nanda'asi.*

Polina nambaso'ma esis Korin, owa'

12 Afa' wandagala ma hiahawes isimba. Malagof fagape opalef apa' nomoni fawalapa basef ifimba fa'ipafa wagafe' waf usi'if hilili'i ma waf opalef bu'walififi God nagaso'afaf afa'i. Gawa epes itapasi ina nawalapa waf afambai ma afa', owa'atin. God nati uwahipifa a'owa' natopalopafa dowaf dei' wafe' na'amba. Wafe' waf afambai la'afena epes hiasi sagape itap apa'ii ea' wanda'as na'amba hiafi ma ipa!.* **13-14** Afa' ina wanda' anif basef ahififi ma ipa', owa'atin. Wanda' andipefi atif, ifimba ipa' ila ma pitalifif pegegawafi. Dei' ipa' ina pegawa waf afa'ifi andeande', ata' owa'. Apa' ae' okom ma'i ipa' atiasi pegawa endilisi waf afa'ifi hiafi hi'ilaf.

* **1:9** 2 Ti 4:18 * **1:11** Hi 13:18; 2 Ko 2:17; 1 Ko 1:17 * **1:12** 2 Ko 5:12; Fl 2:16

Nemaf afamba Dembinai Jisasi, ipa' pendagalama afa' na'amba atin si'i afa' anaf ondagala ma ipa'.

¹⁵ Ae' egawef endilisi basef ali' aga'ipipafi ma waf bu'wafi ipe'ifi. Ea' fowa' ali' anda' okom ma'i efe'mago ipa' etopalopepa bifa ata' pege-gawa waf Godi wapani. Owa' ae' ina afo'o.*
¹⁶ Ae' okom mandanda' ma'i ata' ili' efe'mepago ma main, ekwahipa efe' itap lu'upa Masedonia ma bola ekwaha Masedonia itanima ifi'mipai wapani ma petopalope pesapa'e egafe' itap lu'upa Juda. ¹⁷ Dei' si'i main? Ae' a'ias ea' ma enda'as na'amba, owa' alambama basef ifimba anda' dambaifi faha'ohef? O i'i ae' okom mi'i enda' anin mae, i'i basef biafif "Aho'" neloma "Owa'" wapani si'i epes itapasi saga'i? Owa'atin endilisi.

¹⁸ God anen nanda' hiahaom datimai, naga'i endilisi atisi. Basef hiafi afa' wagase'epafi endilisifi atif na'amba atin. Afa' ina wa'i anif basef biaff, "Aho'" naloma "Owa'" fandahapima atogon, owa'atin.* ¹⁹ Nogamana Godi Jisas Krais, ae'i Sailas waloma Timoti wagawalapa basef ananiffi, anen ina naga'i na'ambai naga'i, "Aho'" i "Owa'" atifi, owa'atin. Krais naga'i aho' atini.* ²⁰ Aho', basefa lap mamahifa God naga'iefi kofagefa fandawalap ea' fa'i Krais atona, anen naga'i aho' atini. Isimba atis dei' apa' ma'i agol Jisas Kraisi atogol ea' ma'i, "Endilisi" ma basef ifimba God nagala' lapafi masa'ma agol ananigili lu'wagol.*
²¹⁻²² God atona nowa' banaga afa', ipa' wapani, ea' mape sisihipama Krais. Anen nanda'mapa

* **1:15** 1 Ko 16:5-6 * **1:18** Ap 18:5 * **1:19** Re 3:14 * **1:20** 1
 Jo 2:27; Ef 1:13-14; 2 Ko 5:5; Ro 8:16-17

ametal ananini apa' nosaho'apa ma mogape ana-nipai atepa ea' naso'apa Ambal bu'unai ananinai nape nomon opalef ape'ilifi. Ambal anamba God nagaso'apani nali' ma hiahaom du'wanim hiami fasimi God na'i anaf nogaso'apami.*

Pol ina notanima nafe'ma esis, owa'

²³ Ae' a'i basef endilisifi atifa naep Godi. Ae' andaiwa' ma egase'epa nimanimi ipa'. Ea' fowa' ina itanima afo'o Korin, owa!.* ²⁴ Afa' ina wape wali'ma oganandona waf ipa' pagahapifa Godafi, owa'atin. Dei' main, ipa' atipa palutu banagepa pahapifana ea'. Apa' dei' afa' wanda' maol walomepa ma onda'epa pendagala.

2

¹ Okom ae'ami a'ias endilisi na'amba a'i, ae' ina ata' itanima efe'mago ipa' wapani enda' opalef ipe'ilifi nimanilif, owa!.* ² I'i enda' opalef ipe'ilifi nimanilifai, atiasi epes mamahisa sonda'e sonehe? Owa'atin endilisi. Ipa' atipa, ea' anda' ukup ipe'ipi iwanip. ³ I'i ipa' sonehepa, ande-ande!. Waf afamba bu'wafi. Apa' i'i ae' efo'o ma penda' opaf ae'afi nimanif, na'ambai andaiwa'. Ea' isimba atis fowa' ali' anda' basef ifimba fafe'mago ipa'. Dei' main, ae' egawa ipa' endilisi na'amba. I'i ae' sonehe epe, ipa' hipai wapani sonehepa.* ⁴ Endilisi anda'mepago basef ifimba ma nemaf afamba opaf ae'afi agame' nimanimi akafimi lu'wami ea' alomam alef hiafi. Ae' ina

* **1:21-22** Ro 1:9; 2 Ko 11:31 * **1:23** 1 Pi 5:3 * **2:1** 1 Ko 4:21;
2 Ko 12:21 * **2:3** Ap 20:31

anda' basef ifimba ma fegase'epa opalef nimanilifi, owa'atin. Anda'efa ipa' pegegawa ae' okom pelele' mailipa a'owa!.*

Esis sondakwaha waf awafi anona owamas nanda'masafi ukup pendaso'asaf

⁵ I'i anin open kofagona nenda' opaf nimanifi figatagai, anin ina nanda' opaf ae'afi atof nimanif, owa'atin. Anin nanda' ipa' hipai opalef nimanilif a'owa!. Ae' a'i basefa ipa' hipai a'a anipa iafipa. Andaiwa' ma iga'i basef banagambel a'owa' ma waf awafi anen nanda'afi, owa'. Isimba atis dei' a'ias na'amba ma anipa iafipa. ⁶ Nimanimi akafimi ipa' epes hipai pagaso'anami ea' mandahama anen. ⁷ Ea' dei' penda' anef waf dajaf anen. Andeande'ma pekwaho waf awafi ananifi ukup pegase'epafa pegewa' banagona penda' opaf ananifi awanef. Na'amba nimanimi lu'wami a'owa' monda' okom ananimi aom a' nefe' lafel endilisi. ⁸ Isimba atis dei' a'ipipa dindinip pihimba'ma anona ukup ipe'ipi uwahipipi lu'up paipailana.* ⁹ Fowa' anda' basef ifimba agwambepa atin. Ama a'i egegawa ipa' paila basef ae'afi dondol a'a owa'atin? ¹⁰ I'i ipa' pekwaha waf awafi anin openi ukup pese'epaf dogw, ae' wapani ekwahomanaf okom mose'eaf. Aho', waf afamba awafi agakwahifi okom ae'ami mandanda' na'amba. Ae' ina egawa okom Kraisi mandanda' ma'imama, apa' i'i andeande'ma ae' egakwahomenafa naep Kraisi, dao' ekwahomanaf endilisi ma etopalopepa pegape

* **2:4** 1 Kro 5:1 * **2:8** 2 Ko 7:15, 10:6

andeande'.* ¹¹ Ae' anda'as na'amba ma Satan ina atiasi nombaso'mapa nikila'apa, owa'. Dei' main, apa' mogawa okom ananimi baso'ami.*

Pol opaf nimanifa wambel ambalemba taun Troas

¹² Fowa' Dembinai nanda' ufia'w kwagala ae' afi'i agataga Troasa agawalapa basef bu'wafi ma Krais.* ¹³ Apa' opaf ae'afi ina fape sa'ombel, owa'. Dei' main, ae' ina ata' ati owame ae'anai Taitus, owa'. Ea' akwaha esis Troas afi'i ataga anep itap lu'upa Masedonia.

Banagami Godi atom amom aposel mali'amona wandafa waf awafi

¹⁴ Apa' dei' ae' anifela God. Dondol anen natopalope ape sisihowi agaloma Krais ea' ali'amona wandafa waf awafi. Ama maol ae'ani God nawalapa basef ea' anis epes sogawa Krais. Gawa inimba anin si'i alogw fasigwi usihigwi gwa gwagafe'agon hi'agalagini.* ¹⁵ Endilisi ae' si'i alogw fasigwi gwai gwatagai Krais gwafe'ma God. Alogw agwamba gwafe' la'afena epes isimba dei' God nokwahomas waf awafi nowambelas sogotanimai, isimba sagape ufia'w kwagafe' heveni saloma isimba sagape ufia'w higilgalasa'wi wapani.* ¹⁶ Ama wambota isimba sagape ufia'w higilgalasa'wi, alogw agwamba hikapigwi sagaga'agwi. Apa' wambota isimba sagape ufia'w kwagafe' heveni, alogw agwamba bu'wagwi gwagaso'as ambal namili. Ea' dei' ae'

* **2:10** Lu 22:31 * **2:11** Ap 14:27; 1 Ko 16:9 * **2:12** Ap 20:1

* **2:14** 1 Ko 1:18 * **2:15** Lu 2:34; 2 Ko 3:5-6

okom mandanda'ma maol inimba Godi a'i ina anis epes la'ifisa sonda'an, apa' owa' ae' la'ifiwi anda'an.* ¹⁷ Dei' main, ae' ina si'i anis epes hiasi safe'agon hi'alagona sanda' maola basef Godi ma sogofa' hiahawes asasisi atis, owa'atin. Ae' anda' maol inimba Godi na'ambai. Ae' ina ambaso'am dowafa maol Godi, owa'atin. Ae' anda'an aila afe' usi'ini atin hi'alan, ape sisihowi aloma Krais. God nasapa'e afi'i awalapa basef fafe' andeande'ma naep ananipi.

3

Amom manda' maola basef dambaifi God naga-la'lapafi

¹ Basef ifimba doko'ifi ipa' pa'i ae' asa'ma agol ae'agili atogol lu'wagol wapani si'i anom amam mambaso'mepa manda'am? O pa'i ae' owa'banagewe enda'as si'i amoma egase'epa anif basefa pas anis daias sanda'afi ma sogasa'ma agol ae'agili? O ipa' wapani atiasi penda' anif basef fil pepa ma pegatopalope? Owa'atin endilisi.*
² Basefa pas sogasa'ma agol ae'agili ea' ipa' atipa. Basef ifimba fail sisihif nomon okom ae'ami. Ama epes hiasi sotalififa sogogawef.* ³ Ipa' pandawalap alihipa, pas isimba ea' ipa' atipa. Krais atona nanda' basefa pas isimba. Anen nandan-depe nase'e pas isimba afo'o ase'epas. Anen ina nanda' ing nufagi'if, owa'atin. Anen nufagi'ifa Ambal bu'unai God nagape namunai. Anen

* **2:16** 2 Ko 1:12; 1 Pi 4:11 * **3:1** 1 Ko 9:2; 2 Ko 5:12; Ap 18:27; Ro 16:1 * **3:2** Eks 24:12; Jer 31:33; Esi 36:26-27

ina nufagi'if fail anom otam wa'ami, owa'atin.
Nufagi'if fail ukup ipe'ipi nomon.*

⁴ Basef ifimba kofagefa na'amba. Krais natopelope endilisi ea' ahapifif banagewe ma God ape na'amba. ⁵ Endilisi ae' atowe ina la'ifiwi ma enda' maol inimba, owa'atin. God atona nanda'e la'ifiwi ma anda' maol inimba ananini.* ⁶ Ea' anen atona nanda'e la'ifiwi ma anda' maola ufia'w basef dambaifi nagala' lapafi. Basefa mu'uli inimba ina sanda'ef fail pepa dowaf, owa'. Ifimba Ambal bu'unai ananinai nagawalapafi. Basef sanda'ef fagail pepa dowafi faha epes sagaga'i, apa' Ambal bu'unai ananinai nanda'as sofa' ambal namili sogape namisi.*

⁷ God nufagi' basef ifimba fowa'ifi ma mu'uli ananini fail otam. Maol Godi amom manda'ani, inimbai natagama ga' naloma mogogala'i ananimi fasimi wapani. Mogogala'i amamba manda' amaga Mosesi gogogala'i a' mataga sa'osa'om, apa' owa', amamba banagem a'owa' ma esis Israel ina la'ifisa naep do' sigati amaga ananigai, owa'*. ⁸ Apa' mogogala'i ma maol Godi Ambal bu'unai ananinai nanda'ani lu'um a'owa' mikila' amamba fowa'imi.* ⁹ Maol fowa'ini nawaloga epes, higililiasi inimba nawalapai mogogala'i Godi. Apa' maol inimba dei'ini nanda' epesa God naga'i esis bo'wes hilili'i, inimba dei' nawalapai mogogala'i ananimi lu'um a'owa' mikila' amamba magali'i.* ¹⁰ Endilisi, mogogala'i fowa'imi ina mogala' na'amba atin si'i dei'imi, owa'. Fowa'imi

* **3:3** 2 Ko 2:16 * **3:5** Jer 31:31; 1 Ko 11:25; Jo 6:63; Ro 7:6 * **3:6**
 Eks 34:30 * **3:7** Ga 3:2,5 * **3:8** Diu 27:26; Ro 1:17, 3:21 * **3:9**
 Eks 34:29

falafumi atom apa' dei'imi lu'um mikila' a'owa'.
11 Maol inimba dei' na'i a' higilgalani, anin fowa' nataga naloma mogogala'i Godi. Apa' mogogala'i dei'imi ma maol inimba nagape liflafii a' lu'um a'owa' mikila' amamba magali'i.

12 Afa' wanda' maol Godii ogawa basef ifimba dambaifi nagala' lapafi endilisifi ea' wape ohafa mogogala'i amamba atiasi mogatagamafa. Ea' afa' ina ombal mahafa kwasakwasala, owa'atin. Afa' banagefa a'owa!.* **13** Ina wape si'i Moses, owa'. Anen nawala lowaf napete'af amaga ananigai nambaho'waga ma esis Israel ina siti mogogala'i amamba mogafe' sa'osa'ombela hi'igalam, owa!.* **14** Owa' ukup asasipi paso'as endilisi. Dei' main, dondol esis sagatalifa basef fagail Baibeli fowa' God nagala' lapafi. Nemaif mamahefa sagatalifa basef ifimba, lowaf afamba wa'afi fagape amaga Mosesi ata' fape atapif fasopama ukup asasipi fafi'i fafi'i fataga dei'. Ina fandatagwah, owa'atin. Krais atona, dao' God nahape' lowaf afamba. **15** Fowa' sagatalifa basef Moses nanda'afi safi'i sataga dei', lowaf afamba ata' faso'ala opalef asasilifi atapif.* **16** Apa' i'i epen ami nembema opaf nefe'ma Dembinai, dao' a' fendatagwah.* **17** Dembinai anamba anen Ambal bu'unai Godi. I'i Spirit Ambal Dembinaii nogape anin epen, ina ata' anis maefah sili'ama anin, owa'atin. Anin nepe wahifin.* **18** Ea' apa' hiapai dei' mape amagah wafigah, mogogala'i bu'wami

* **3:12** Eks 34:33-35 * **3:13** Ro 11:25 * **3:15** Ro 11:23,26

* **3:16** Jo 8:32,36; Ro 8:2; Ga 5:1 * **3:17** Eks 16:7, 24:17

Dembinai mogala'ma apa' mogogaifa anis epes. Apa' mape na'amba dei' Ambal bu'unai Godi naho'ofa waf ape'ifi ea' mandati si'i Dembinai ma mogogala'i amamba mataga lu'um atapim mafe' atin mape. Amamba mataga Dembinai atona, anen Ambal bu'unai Godi.

4

Amom aposel si'i maloh sanda' itap sagala' ami

¹ God na'i afa' uwahipifa dei' naso'afa maol inimba. Ea' afa' ina wandahagasa maol inimba, owa'atin.* ² Afa' owa' alafugah ea' ma waf ambagof awagufi sandambaho' sanda'afi. Ina ata' wape wafe' waf afamba baso'afi uhufifi watalapa basef Godi walambama lambamaifi wa'if, owa'atin. Afa' wagawalapa basef endilisifi alihifa naep Godi ma epes hiasi seme'ef sogogawef malogof fagape opalef asasilifi nomoni. ³ I'i basef ifimba bu'wafi Godi wagawalapafi fendambaho', dao' fandambaho'ma epes isimba atis sagafe' ufia'w higiligalasa'wi. God baso'amunai itap apa'inai nasopama opalefa epes isimba owa' sogahapifa Godia.* ⁴ Ama basef ifimba bu'wafi kofagefa ma mogogala'i Kraisi ina attiasi fiwis nomona opalef asasilifi, owa'. Esis ina sati Krais nandati na'amba atin endilisi si'i Godi, owa'!.* ⁵ Dei' main, afa' ina wawalapa basefa afa' ogasa'ma agof afa'igufi lu'wagof, owa'atin. Afa' wawalapefa Krais Jisas atona anen Dembinai. Afa' waila waf Jisasi dei' agof akafa wape lafela

* **4:1** 2 Ko 2:17; 1 Te 2:5; 1 Ko 1:18; 2 Ko 3:6 * **4:3** Ef 2:2; Kl 1:15;

Hi 1:3 * **4:4** 2 Ko 1:24

ipa' wanda' maol watopalopepa.* **6** Fowa' God nati akot atona na'i, "Lola a' nendataga."

Dei' ea' anamba atona nanda' mogogala'i ananimi mataga ma afa' ea' manda' opalef afa'ilifi fegala' a'owa'. Mogogala'i amamba mihimba'mapa gawa ma mogogala'i banagami Godi mape atapim mogala'. Apa' mati amamba ma waf Jisas Kraisi fegala' fataga amaga ananigai.*

7 Apa' hiahaom amamba fasimi mogogala'i maloma banagami Godi, amamba mape opalef afa'ilifi nomon, afa' si'i maloh sanda' itap sagala'ahi. Ama migihimba'ma epes hiasi sogogawa banagami amamba Godi atom. Afa' owa!.* **8** Fe' poe afa'ini fowa' dei' wapani nagape na'amba. Anamba hiagoma ogafe'ma dondol akafimi matagamafa, apa' amom ina mahambombagafa endilisi, owa!. Hiahaom hiami masopama nomonas afa'isi, apa' nomonas afa'isi ina higilalas hi' alas, owa'atin. **9** Anis epes sanda'afa tofalafa ma sonda'afa aofa, apa' God ina nakwahofa, owa!. Esis sahafa owa wa'oh, owa', owa'atin. Ina afufa endilisi, owa!.* **10** Lifilafi afa' ofa' akafimi ma ga' Jisasi alop afa'ipi wafe'. Wanda'as na'amba ma ambal namonai nagape Jisasi wapani nagataga alihina alop afa'ipi.* **11** Dei' main, afa' wanda' maol Jisasi. Isimba atis dei' nimaguf hiafi dondol anis epes sa'i sohafa ome' akafimi oga'. Ama ambal namonai nagape Jisasi notaga nondawalap alop afa'ipi, owa' namop atapip pogapania. **12** Ea' dei' epes

* **4:5** Jen 1:3; Ais 9:2; 2 Ko 3:18 * **4:6** 2 Ko 5:1 * **4:7** 2 Ko 1:8,
7:5 * **4:9** 1 Ko 15:31 * **4:10** Ro 8:36

isimba sa'i sohafa og'a' ma ipa' pagahapifanai
pefa' ambal namili pegape andeande!.*

13 Baibel naga'i na'i, "Ae' ahapifa God. Isimba
atis dei' awalapa basef alihif a'if."

Afa' wahapifa God na'amba atin si'i Baibel
naga'i dei' wawalapef wa'if.* **14** Dei' main,
afa' ea' ogawa God nasa'ma Dembinai Jisas no-
gosafel matmati, anen atiasi nosa'ma apa' wa-
pani moloma Jisas ea' nofa' afa' oloma ipa' noko-
lasepa atogon mofe' mope felefele' molomana.*
15 Hiahaom amamba akafimi hiami matagamafa
ma ogatopalopepa. Afa' wafe' wa'ipasa basef
God nagatopalopapa dowafafi fefe' fetaga atapif
fefe'agon hi'igalagon. Ea' esis sondabeten sinifela
God sogasa'ma agol ananigili lu'wagol.*

16 Afa' ukup papoma isimba dei' ina wanda-
hagasa maol Godi, owa'. Endilisi, pepela alop
afa'ipi na'i a' newafa atapin hi'ilan. Apa' owa',
opalef afa'ilifi fataga dambailif wapani nimaguf
hiafi danda.* **17** Aho', nimanimi amamba ma-
gatagamafai amamba sa'osa'om a'owa' ea' ati-
asi mope nogota bandata. Nimanimi amamba
anaf mowalapai mogogala'i poe bu'wani endilisi
gani heven dondol lifilafi. Poe inimba bu'wani
anaf nikila' endilisi nimanimi amamba sa'umi
dei'imi.* **18** Dei' main, afa' ina naep do' ba-
nagambela hiahaom sagatolom naepi, owa'. Hi-
ahaom owa' sogatolom naepia, dao' watolom ba-
nagambel. Dei' main, hiahaom sagatolom naepi,

* **4:12** Sam 116:10 * **4:13** 1 Ko 6:14 * **4:14** 2 Ko 1:3-6 * **4:15**
Ef 3:16 * **4:16** Ro 8:17-18 * **4:17** Kl 1:16; Hi 11:1-3

amamba atiasi mogape nogota bandatai. Apa' hia-haom amamba owa' sogatolom naepia, amambai mogape lifilafi dondoli.

5

Amom aposel mahapifa God mofa' banagami

¹ Dei' afa' ogawa na'amba. Nemaf afamba ipat atamba sogowalo' selitai sagala'ata itap apa'ii ton-datal aota ma, ea' hapaitai. Afa' anota God na'i nogaso'afatai dambaitai. Ipat atamba epes ina sanda'ata sala'ata lagof asasigufi, owa'. Atamba tapani heven ea' totawa lifilafi dondol.* ² Dei' afa' wape alop si'i ipat itap apa'e, ea' kem atin wape. Afa' ukup pa'ipa'i a'owa' ma ipat atamba afa'itai tagape heveni ma atiasi togaso'ala alop afa'ipi si'i klos luwaguf. ³ I'i afa' ogola klos amamba ea', alop afa'ipi ina atiasi pil wafip dowaf, owa'!* ⁴ Aho', nimaguf hiafi afa' ata' wape itap apa'e wape at-apifa ipat anamba sogowalo' selanai ea' opalef nimanilif kem atin wape. Afa' ina wandaiwa'ma ogakwaha alop dei'ipi, owa'. Afa' wa'i ondawisa alop dambaipi si'i klos luwaguf ama alop anamba na'i nogaga'i atiasi a' nondambema nogataga ambal dambaili namili endilisi.* ⁵ God atona nadondombafa ma ogofa' alop apamba dambaipi ea' naso'afa Ambal bu'unai ananinai. Ambal anamba nagali'ma hiahaom amamba hiami nanda'ami ma na'i anaf nogaso'afam afa'i ea' ogawa endilisi atis anaf a' noso'afam.*

* **5:1** Ro 8:23; 2 Ko 4:7; 2 Pi 1:13-14 * **5:3** 1 Ko 15:53-54 * **5:4**
Ro 8:16,23 * **5:5** Hi 11:13-16

6 Ea' dei' hiahaom amamba mowa' banaga opalef afa'ilifi dondol. Afa' ogawa, alop afa'ipi ata' si'i ifagw afa' wagapaugwi. Ama nogota ata'e wagape alop apa'e, ina dei' wape waloma Dembinai ma wambel ananimbili, ata' owa!.* 7 Dei' ata' wahapifana wafe!. Afa' ina dei' watolona, ata' owa!.* 8 Owa' ae' a'ias ea', opalef afa'ilifi fape banagalef, ukup pehafel a'owa' ma ogakwaha alop dei'ipi ofe' ope ogaloma Dembinai wambel kofagama afa'ima.* 9 I'i ope ogalomana ilif a'a ogape alop apa'e ma itap apa'e, hapaimi. Afa' dondol ukup pali' pahafel banagepa ogaila okom Dembinaii atom.* 10 Apa' mogawa endilisi anaf apa' hiapai motaga ma kot atamba Kraisi hi'ilapa. I'i apa' monda' waf bu'wafi a'a waf awafi nogota atamba ata' magape alop ape'ipi. Anaf apa' hiapai atona atin mofa' hiahaom amamba bu'wami a'a awami mogwama waf afamba apa' manda'afi.*

Amom aposel manda' maol mogatopalopa esisa sogataga opafatof sogaloma God

11 Afa' ombel mahafa ma Dembinai. Isimba atis dei' wanda' maola wagasa'ma nomonas epesi ma sogahapifana. Apa' naep Godi afa' wape alihifa ea'. Ae' okom mandanda' na'amba a'i waf afa'ifi fandawalap alihifa malogof fagape opalef ipe'ilifi nomoni.* 12 Basef ifimba afa' ina wa'i osa'ma agof afa'igufi atogofa ipa' piga'i afa' amam bu'ufai, owa!. Wa'i onda' ufia'wa ipa' sownogahepa ma afa' naep anis epesi. Wanda'as na'amba ma ipa'

* 5:6 1 Ko 13:12 * 5:7 Fl 1:23 * 5:8 Kl 1:10; 1 Te 4:1 * 5:9
Ekl 12:14; Ro 2:16, 14:10 * 5:10 2 Ko 4:2 * 5:11 2 Ko 3:1, 1:14

la'ifipa ma pegagwamasa basef esis epes isimba sandagala ma anis daiasi dowafa alop atopi owa' sondagala ma waf bu'wafi asasifia. ¹³ I'i endilisi afa' ope si'i ukup pagaso'asiai, ea' diaogo, hapaimi. Afa' wanda'am na'amba ma ogosa'ma agol Godi. I'i endilisi afa' ukup pepomas andeande', dao' afa' wanda'as na'amba ma wagatopalopepa. ¹⁴ Okom Kraisi magamagailapai atom masa'mafa ma maol inimba. Dei' main, afa' ukup pandanda' pegawa endilisi na'amba. I'i aman attona noho'ofa apa' hiapai hi'alapa ma nagaga', isimba si'i apa' hiapai a' maga' ea!.* ¹⁵ Ea' anen naho'ofa apa' hiapai naga' ma apa' epes mogape namepa ma ina a' ukup pelapefe' a'owa' ma apa' atepa, owa'atin. Apa' ukup pendanda'ma aman anamba naha'ofapa naga' ma notanima nogosafel wapanii, ukup pendanda'mana mondanda' maol ananini atapipa.

¹⁶ Isimba atis dei' afa' ina ata' waila opaf apinai wawaloga waf anin epeni, owa'atin. Endilisi, fowa' waila wafa opaf apinai ea' wawaloga Krais na'amba. Apa' dei' owa!.* ¹⁷ Ea' i'i anin epen nepe negaloma Kraisi, God nanda' anin nataga dambain endilisi. Dei' peme' andeande'. Waf afamba apifi ananifi ahi'alaf ea!. Dei' nanda' waf dambaifi.* ¹⁸ God atona kofagonama waf afamba epes sagataga dambaisafi. Fowa' apa' ata' mape baopai atin, owa' Krais nataga nanda'apa mape opalef atelef maloma God. Ea' God naso'afa maol inimba ma ogatopalopa anona onda' esis bousi

* **5:14** 1 Ti 2:6; Ro 14:7-8 * **5:16** Ro 8:1,10; Ga 6:15; Ais 43:18; Re 21:5 * **5:17** Ro 5:10

ananisi sotaga opalef atifilif sogalomana.*

19 Basef afa'ifi na'amba. Krais atona God nanda' maol nanda' epes hiasi

Basef afa'ifi na'amba. Krais atona God nanda' maol nanda' epes hiasi sakwaha waf naumbihihi sataga opalef atelef salomana. Anen ina ata' okom mandanda'ma waf awafi esis sanda'afi, owa'. Ea' naso'afa maol inimba ma ogawalapa basef ananifi ma nonda' esis bousi sotaga opalef atelef sogalomana. **20** Ea' afa' dei' ofa' malogol Kraisi wawalapa basef ananifi. Isimba na'amba atin. God atonanofala epes hiasi banagambela malogof afa'igufi. Ea' waho'ofa Krais wa'ipas na'amba wa'i, "Ipa' pendakwaha waf naumbihihi ma petaga opalef atifilif pegaloma God."*

21 Aman anamba ina nanda' waf awafii, apa' God nakolasa awami ape'imi hiami hi'alam mafe'ma anen atona ea' kofagema ape'imi mapoma anen atona nofa'am. Anen nanda'am na'amba ma apa' mogape sisihipama anona mogofa' waf ananifi be'ef hilili'i.

6

Amom aposel mofa' akafimi hiami ma maol Godi

1 Afa' wanda' maol Godi wandao'oma walomania. Dei' wa'ipipa banagambel na'amba wa'i, "God natopalopepa dowaf ea'. Na'amba ipa' ukup pese'epa waf afamba nagatopalopepa dowafafi, owa'i."* **2** Peme!. God naga'i na'amba na'i, "Nemaf

* **5:18** Ro 3:23-25; Kl 1:19-20 * **5:20** Jo 8:46; Hi 4:15; Ga 3:13; 1

Ko 1:30; Fl 3:9 * **6:1** Ais 49:8; Lu 4:19-21; 2 Ko 5:20

ae' agati uwahipipafi afamba ame' basef ipe'ifi ea'. Nemaſ afa'e ae' atopalopepa a'i efa'epa pigatani-mai."

Peme'! Dei' atef nemaf God nagati uwahipipafi. Dei' atef God na'i ekwahomepa waf awafi nofa'apa mutanimai.

³ Afa' wandaiwa'ma epes siga'ipafa basef awafi ma maol Godi afa' wanda'ani. Isimba atis dei' wandaiwa'ma onda' anis hiahawasa waf awafi soha bo'wagah asasigahi sogowa, owa'atin.* ⁴ Apa' dondol wihiſba'ma epes hiasi wanda' maol Godii. Dei' wihiſba'mas na'amba. Walutu banagefa endilisi ma nimanimi mamimami magatagamafa ma hiahaom ma'i mogahambombagafai.* ⁵ Eſis sahafa sanda'afa wanda' kalabus. Eſis bousi sanda'afa tofalafa sa'ipafa awa awagon. Afa' wanda' maol numa'uni endilisi. Ina wa' gwa'aisi wape wa'oh andeande', owa'atin.* ⁶ Wanda' waf bu'wafi hilili'i ea' wahapila gawa fasini, opalef awanelef walutu banagefa ma nimanimi. Wanda' waf bu'wafi ma anis epesi. Ofa' banagami Ambal bu'unai Godi, wanda' waf afamba endilisi ma ukup pagapagaila anis epes watopalopas. Ina wa'i basef malogof atogof, owa'atin.* ⁷ Wawalapa basef endilisifi, wanda' maol banagambela banagami Godi. Afa' wahapila waf bu'wafi hilili'i si'i wahapila hiahawes wagapa'asi lagof biagof kwahisigili gagaili. ⁸ Anis epes sasa'ma agof afa'igufi a anis satalogofafa. Anis sa'i basef awafi sanda'i'ipamafa apa' anis sa'ipasa basef

* **6:3** 2 Ko 4:2 * **6:4** 2 Ko 11:23-27 * **6:5** 1 Ti 4:12 * **6:6** 1 Ko 2:4

anis daiasa waf bu'wafi afa' wanda'afi. Esis ukup pandanda'mafa sa'i afa' epes wagambaso'ami, apa' owa', esis atis epes sagambaso'ami. Afa' waga'i endilisii.* ⁹ Wanda'as na'amba, ina a' anin epen negawa afa', apa' owa', hiasi sogawafa. Afa' si'i epes ea' wagaga'i, apa' owa'atin. Afa' ata' wape namofa. God ata' nopagahofa bumbulita ma nagasindi'amonafa, apa' anen ina nahafa afuta, owa!.* ¹⁰ Afa' opalef nimanilif endilisi, apa' owa' sonahafa dondol. Wape si'i isimba hiahawes akasi kwahusi apa' owa' waso'asa hiahaom afa'imi ma epes hiasi. Afa' hiahawes akafa si'i isimba kwahusi, owa' waf bu'wafi Godi fihimba'mafa wape si'i hiahaom hiamifai.

¹¹ Ipa' Korin alipipai, ae' a'i basef hiafi bu'wafi fagape okom ae'ami awalapefa ipa' alihif hi'alef, ae' okom pelele' maimailipa a'owa' si'i agalopepa. ¹² Ae' ina asopama opaf ae'afi isambalipa, owa'atin. Ae' okom maimailipa a'owa'. Apa' owa' ipa' apasopama opalef ipe'ilifi. Ea' ina a' mape opalef atifilif endilisi, owa!.* ¹³ Dei' ae' ahamepa, ipa' si'i awasi ae'ipai. Ipa' a' ukup pelele' pindapindaili si'i ae' okom pelele' magamagailipa a'owa!.*

Apa' si'i ipat Godi lu'unai

¹⁴ Epes isimba owa' sogahapifa Godia, ipa' ina pelomas pepe pefe' atogon atin, owa'i, hapaisi. Dei' main, waf afamba usi'ifi ina fape atogon faloma waf afamba sogosambala basef Godi,

* **6:8** 2 Ko 4:10; Sam 118:18 * **6:9** 2 Ko 7:4; Fl 2:17; Kl 1:24

* **6:12** 1 Ko 4:14 * **6:13** Ef 5:7,11

owa'atin. Dei' maina owambi alip sondakolas atogon? Owa'atin. ¹⁵ Pa'i Kraisi Satan mape mofa' opaf atifif? Owa'atin endilisi. Dei' epes isimba sagahapifa Godi saloma epes isimba owa' sogohapifanaia sogofa' nomonas atifis, atiasi esis sonda' waf mamahefa? Owa'atin. Ina sonda' anef waf bu'wafi atifif, owa'!* ¹⁶ Dei' a'ipipa basef ifimba esa'ma ukup ipe'ipi. Apa' ina andeande'ma mokolasa ipat Godi lu'unai nogaloma hiahaom baso'ami sandombam sanda'lotumami, owa'atin. Ipa' pegawa apa' atepa si'i ipat anamba God nagaunai nomon. Si'i fowa' anen na'ias na'amba naga'i,

“Anaf ae' epe elomas efe' la'afena esis ea' epe God asasiwai a esis wapani sepe epes ae'asi.”*

¹⁷ Ea' Dembinai na'ias wapani na'i,

“Ipa' pendakwaha esis pefe' pepe anagon daiagon. Ea' ipa' ina pihapila hiahaom alugumi awami, owa'i. Ama bola ese'epa opaf igifa'ipai.* ¹⁸ Ama egape Ahamepa ipe'iwai ipa' pegape awasi amam nematawa ae'ipai. Dembiwai kofagewema banagami hiamii aga'ias na'amba.”

7

¹ Ipa' alipipai afa'ipai endilisi, apa' ea' mofa' basef ifimba Godi endilisifi banagafi. Ea' mondelefata hiahaom amamba awami magape nomona alopi ambagof ape'isi ea' mondape

* **6:15** 1 Ko 3:16; Lev 26:12; Esi 37:27 * **6:16** Ais 52:11; Esi 20:34;
Re 18:4 * **6:17** 2 Sml 7:14; Ais 43:6; Jer 31:9; Re 1:8

be'epa ombel mondahapama God mila waf
endilisifi hilili' a'owa'i.*

Esis Korin sambema opalef, dei' Pol a' sonahana

² Ipa' dei' pendaso'afa opalef ipe'ilifi. Afa' ina wanda' anin epen ipe'ini awen a'a wahambomba-ga anin, ondololaepa anin epena hiahaom ananimi, owa'atin.* ³ Ae' agawalapa basefa ipa', ina a'ipipa a'i kofagema ipe'imi atom, owa'atin. Ae' a'ias a'i afa' wase'epa opalef afa'ilifi ipa'. Wanda'as na'amba ma i'i ipa' pegaga'ma, afa' oga' ogalomepa. Apa' i'i pegape namipama, afa' wapani ope namofa olomepa. ⁴ Ae' okom mandanda'mepa endilisi ipa' pape andeande!. Anda-gala a'owa' ma ipa'. Nimanimi magatagama ae'i hiami, apa' owa' okom ae'ami mapomago ipa', isimba atis dei' sanda' opaf ae'afi fape sa'ombel sonehe endilisi.*

⁵ Fowa' afa' waf'i ogataga itap lu'upa Masedonia ma anamba wapani, alop afa'ipi ina papoma noma'w kwasakwasala, owa'atin. Nimanimi mamimami hiami matagamafa, sa'i basef banagafi safitap salomafa. Ea' ombel mahafa ukup palapafe!.* ⁶ Apa' God nowa' banaga epes isimba opalef nimanilifi nasapa' Taitus natagamafa nowa' banagafa. ⁷ Ina Taitus atona natagamafa dei' God nowa' banagafa, owa'atin. Ipa' pewa' banaga Taitus, isimba atis dei' God nowa' banagafa wapani. Taitus na'ipafa na'i ipa' ukup pehafel a'owa' ma pa'i pegatolowe ea' opalef ipe'ilifi falopa fowa' pagase'e akafimi ae'. Ea'

* ^{7:1} Ap 20:33; 2 Ko 12:17 * ^{7:2} 2 Ko 6:11-12 * ^{7:4} 2 Ko 2:13

* ^{7:5} 2 Ko 1:3-4

nomonas ipe'isi sohafel a'owa' ma pegape opalef atelef pegalome. Isimba atis dei' sonahe a'owa' ikila' fowa'!*

8 Endilisi ae' egawa basefa pas anda'as sali' sagafo'owi fanda' opalef ipe'ilifi iwanilif, apa' ae' ina opaf iwanifa isimba, owa'. Endilisi, fowa' ae' nembel a' nimanimbil apa' dei' owa'atin. Ae' egawa pasa basef ifimba fanda' opalef ipe'ilifi nimanilif, apa' owa', amambai nogota bandataimi atom. **9** Apa' dei' ae' sonahe. Ina sonahema basefa pas isimba fanda' ukup ipe'ipi iwanip, owa'. Ae' andagalama amamba a' manda'epa ea' pambema nelelemb pafe'ma God. Ae' egawa God atona nawalapai nimanimi amamba ipe'imi ma nagatopalopepa.*

10 Waf Godi na'amba. Nimanimi maim anen nagawalapami manda'apa mombema nelelemb mefe'ma anen nokwahomapa waf awafi nofa'apa mogotanimai. Apa' ina a' nelelemb nimanilimba nimanimi amamba God nagawalapami, owa'atin. Apa' i'i opalef nimanilifa waf itapafi, afambai dao' awafi fagawalapai waf saga' sagafe' wambel awambiliafi, hapaifi. **11** Ipa' ukup pendape andeande'ma nimanimi amamba ipe'imi. God nanda'am mawalapai waf bu'wafifafifi hiafi ma ipa'. Amamba maso'mepa pasafel kwafalisa pegenandona waf ipe'ifi. Ipa' ambagof awagofa epen inimba ipe'ini nanda' waf awafii, isimba atis dei' ombel mehepama basef aga'ipipaefa okom wandafunai Godi. Opalef ipe'ilifi falef a'owa' ma pa'i pegatolowe ea'banagepama pigasindi'amona

* **7:7** 2 Ko 2:4 * **7:9** Mt 27:3-5; Hi 12:16-17

epes isimba sanda' waf awafii. Ipa' pagalo'ma epen inimba napani laogon. Panda'as na'amba dei' ma pihimba'ma epes hiasi waf awafi kofagefa akepa ma hiahaom amamba mogatagamipai.

¹² Ea' endilisi fowa' anda'mepago basef ifimba, ae' ina okom mapoma epen inimba nanda' waf awafii, a'a inimba nagame' akafimi ma waf afambai, owa'. Ae' a'i waf ipe'ifi fetaga fendawalap alihifa naep Godi ma pegegawaf andeande' na'amba. Ipa' ukup paipailafa a'owa'. Ea' isimba atis ae' fowa' anda'mepago basef ifimba. ¹³ Waf afamba ipe'ifi fanda'afa wandagala fowa' banagafa.

Apa' ina afa' atofa wandagala, owa'. Tatus wapani nandagala a'owa'. Dei' main, ipa' hipai panda' ambal ananili a' lapoma noma'w. Afa' wati isimba atis, asonahafa a'owa'. ¹⁴ Fowa' andagalaepa asa'ma agof ipe'igufi lu'wagofa nogohnaep Tatusi ea' dei' ae' ina ambal aola waf afamba, owa'atin. Basef hiafi afa' waga'ipipafi ifimba endilisifi. Ea' na'amba atin basef fowa' wagasa'ma agof ipe'igufi ma nogohnaep Tatusi, ifimba wapani fataga fendasali alihif, ifimba endilisifi atif.*

¹⁵ Fowa' anen nafe'mago ipa', ipa' hipai paso'ana opalef paila basef ananifi ombal mahepa ma pegasambalif. Anen ata' okom mandanda'ma isimba atapis dei' okom ananimi maimailipa endilisi. ¹⁶ Dei' ae' andagala endilisi ma egegawa ipa' hipai panda' waf hiafi andeande' datima.

* ^{7:14} 2 Ko 2:9

8

Esis Kristen satopalopa esis alipisi saso'asa otamba

¹ Ipa' alipipai, dei' a'i i'ipipa ma ata' pege-gawa waf esis sios Kristen hiasi sagape analemb walemb itap lu'upa Masedoniai. God natopalopas nihimba'mas waf bu'wafi sagatopalopa anis daiasafi.* ² Nimanimi lu'wami matagama esis ea' amamba magwamba opalef asasilifi a'owa'. Ea' nogota atamba esis sape hiahawes akas endilisi. Apa' owa', owa'atin esis sofa' dagala lu'unai nalomam. Ea' esis ukup pandanda' ma anis Kristen daias kwahusi, satama moni mais hiasi ma sogatopalopas. ³ Ae' egawas ea', awalapas a'ias sandawalap alihis. Isimba hiahawes kwasala'wis saga'omasi esis ilama sogaso'asas, esis saso'asas. Apa' ina saso'asa isimba atis, owa'. Saso'asa anis hias wapani. Ea' asataga wamasa hiahawes endilisi. Esis sandaila ukup asasipi atip.* ⁴ Ea' esis banages a'owa' ma afa' sa'i uga'i aho'ma sonda' maol sogaloma anis Kristen daiasa sogatopalopa epes Godi kwahusi sagape itap lu'upa Judiai. ⁵ Fowa' afa' ukup pandanda' na'amba wa'i atiasi esis sogaso'as anin moni. Apa' owa' esis ata' sali' saso' esis atisa Dembinai ma main, saila okom Godi saso'afa nelelemb asasilimbi afa' wapani ma sogaso'afa anemba otamba sogotopalopa Kristen kwahusi.

⁶ Fowa' Taitus nasa'ma maol inimba ma ipa' pagatopalopa Kristen isimba dowaf. Isimba atis dei' afa' banagefa ma anen notopalopepa ma

* **8:1** Ro 15:26 * **8:3** 2 Ko 9:1-2

pigambifa maol inimba ahi'igalan.* ⁷ Alipipai, hiahawes hiasi ipa' panda' waf fasifi a'owa', pikila' anis daiasa waf afambai. Ipa' pahapifa God banagambel. Ambal bu'unai Godi nase'epa gawa NASA'mepa ma pegawalapa basef bu'wafi. Ipa' pasafel endilisi ma panda' maol Godi ea' ukup paipailafa wapani. Ipa' panda' waf afambai fasifi na'amba. Dei' afa' wa'i ipa' pendanda' anef waf bu'wafi wapani. Petopalopa esis Kristen kwahusi pese'as anis hiahawes dowaf.

⁸ Dei' ae' ina a'ipipa dindinip, owa'atin. Doko' a'ipipa ma waf esis Kristen sagape Masedoniai. Esis sape wamasa hiahawes endilisi apa' owa', ukup pahafel endilisi ma sagatopalopa anis daias dowaf. Dei' a'ipipa basef ifimba ma ewaloga waf ipe'ifi ukup pagapagailasafi egegawaf. Fape be'ef endilisi si'i anis Kristen, a'a owa?* ⁹ Aho!! Ipa' pegawa ufia'w dembinai Jisas Krais nagatopalopapa dowafa'wi. Ufia'w akwamba na'amba. Fowa' anen hiahaom hiamunai, apa' dei' a' nataga wafinai endilisi. Natopalopepa dowaf nataga nape kwahunai, ea' isimba atis dei' ipa' pefa' waf bu'wafi faloma hiahaom hiami bu'wami.

¹⁰ Nomonas ae'asi isi'i dei' awalapasoma ipa'. Doko'igil ipa' pali'a anis daias ukup pehafela pagatopalopa anis daias wamasa hiahawesi ea' panda'as pali'. ¹¹ Isimba atis dei' penda'as pimbifas. Ipa' fowa' ukup pehafel kwafalis atis a'owa' ma pegatopalopas. Ea' dei' wapani na'amba atin kwafalis atis penda'as hi'indalas dondo' na'amba atina hiahawes saga'oma ipe'i.* ¹² I'i ipa' ukup

* **8:6** 1 Ko 1:5; 1 Ko 16:1-2

* **8:8** Mt 8:20; Fl 2:6-7

* **8:11** Mk 12:43

pehafel endilisi ma pegasopalopas paso'as dondo' si'i hiahawes saga'oma ipel'i, na'ambai God natilis na'i waf bu'wafi ma okom ananimi. Apa' hiahawes ipa' akepamasi, God ina okom mandanda'mas, owa'!

¹³ Ae' ina a'ipipa petopalopa anis asogape andeande'ma ipa' pegape awepa, owa'atin. A'i ipa' hipai pendape dondo' na'amba atin.* ¹⁴ Dei' nogota ata'e hiahaom ipe'imi amamba matopalopa epes isimba hiahaom akasi. Ama anaf ipa' hiahaom akepa, hiahaom asasimi motanima motopalopa ipa' hiahaom akipai. Penda'as na'amba ma pegape dondo'epa atin.* ¹⁵ Amamba si'i Baibel na'iam naga'i, "Epen negefa' hiahaom hiamii, amamba ina ahiam si'im kwaef a'owa', owa'atin. Apa' epen negefa' hiahaom kwaia'umi, anin ina waowaola anis maefah, owa'atin."

*Taitus naloma amam biam manda' maol Godii
atiasi mofe' Korin*

¹⁶ Ae' anifela God, anen nasa'ma okom Taitusi a' nomonas atifis si'i ae'. Ea' okom mohafel a'owa' ma nogatopalopepa. ¹⁷ Anen ina naila basef afa'ifi atifa osapa'ana nogafe'mago ipa', owa'. Anen okom mohafel wapani ma maol inimba. Ea' dei' okom ananimi atom na'i nefe'mago ipa'. ¹⁸ Ea' afa' atiasi osapa' anona alipunai nofo'o nolomanago. Dei' main, aman anamba agilinai ma esis Kristen hiasi nanda' maol nagawalapa basef bu'wafi Godi. ¹⁹ Ina isimba atis, owa'. Esis sios hiasi sandandepana ma nofe' nolomafa ogofa'o otamba ipe'imbai ma ogatopalopa Kristen isimba

* **8:13** 2 Ko 9:12 * **8:14** Eks 16:18

kwahusi. Maol inimba afa'ini ukup pagapagailasani. Afa' onda'ana ogasa'ma agol Dembinai atogola wigihimba'ma epes hiasi sogogawa opalef afa'ilifi fehafema ogatopalopas.

20 Afa' wandaiwa'ma anin epen niga'i basef awami ma waf afa' wanda'afa ugumafi otamba ambamba hiambai ipa' paloma anis daias panda' ofambai. Isimba atis dei' afa' wa'i osapa' owa-mafa anamba nifl'i nefel'mago ipa'. **21** Afa' ukup pandanda'ma onda' waf bu'wafi atefa epes hiasi. Ina naep Dembinai atip, owa'. Nogohnaep epesi wapani.

22 Ea' afa' wa'i osapa' anona owamafa afa'inai daiana nifl'i nolomago amom biam. Dondol afa' wagwambana wandondonama ma maol hiani nanda'ani naninani. Owa' wati anen okom mohafel endilisi ma nondan'an. Dei' anen nogawepa endilisi na'i ipa' panda' waf bu'wafi atifi. Ea' anen banagona a'owa' ma nogatopalopafa umafi otamba ambamba ogafo'o.

23 Taitus ipa' pegawana. Afa' wanda'oma wanda' maol atini ma wagatopalopepa. Alipumi biam mofo'o mogalomanai mofa' malogof esis sios hiasii mofo'o. Amom manda' maol Krais magasa'ma agol ananigli.* **24** Ea' ipa' pihimba'manago waf pigati uwahipisafi ma amom wanom ama esis sios hiasi hi'ilas sogogawa endilisi waf afamba ipe'ifi, ma sogogawa wapani afa' ina sonahafa ma ipa' dowaf, owa'atin.

9

* **8:23** 2 Ko 7:13-14

Esis saso'asa hiahawes sagatopalopa epes Godi hiahawes akasi

¹ Ipa' pegawa ea' ma maol bu'wani pagatopalopa esis amam nematawa Godi hiahawes akasi. Ea' ae' ina enda' anif basefa isimba, owa!.* ² Ae' egawa ea', nelelemb ipe'ilimbi basafela panda' maol inimba ea' dondol agasa'ma agof ipe'igufi ma nogohnaep esis Kristen sagape itap lu'upa Masedoniai. Aga'ipas na'amba a'i, "Afagol gagalimba gagali'i esis Grik asanda'as dumbulidombol ea' ma sonda' maol inimba."

Ea' esis same' basef ifimba ma ipa' ukup pe-hafema maol inimba. Dei' isimba ea' sasa'ma esis Kristen Masedoniai hiasi ma sonda'am wapani. ³ Apa' ae' andaiwa'ma basef afa' wagasa'ma agof ipe'igufi ma esis Kristen Masedoniaisi atiasi fegataga falafifi atif, owa!. Isimba atis dei' esapa' owapepa ipe'imi wanom mefe'mago ipa'. Andeande'ma ipa' dumbulidombol pegape si'i aga'ipipas. ⁴ I'i owa!, anis Masedonia sifi'i solome siti ipa' ata' owa' penda'as dumbulidombola, afa' ambagof awagofa isimba ea' ipa' wapani pelomafa. Dei' main, afa' wali' wa'ipipas wa'i ipa' penda'as dumbulidombol ea'. ⁵ Ea' ae' okom mandanda' a'i i'ipa amom alipumi wanom dindinipa muli' mofo'o motagamepa ma mondon-domba otamba ambamba ma'umba pali' pa'ias pa'i pegaso'asambai. Ea' penda'as na'amba ma nemaf ae' egafo'o penda' otamba ambamba hi-ambai dumbulidombol bo'oh. Ambamba afa' ina wasapa'epa dindinipa pegambe'amba, owa!. Ukup ipe'ipi atip pandanda' ma pegaso'asamba.*

* **9:1** 2 Ko 8:1-7 * **9:5** Pro 11:24, 22:9; Ro 12:8

6 Ipa' ukup pendapoma epen inimba nagawa gwa'aisi kwasala'wisii. Anaf anin negala'as sotaga kwasala'wis. Epen nagawa haesii anaf nela' hiasi. **7** Ea' ipa' hipai ata' pili' ukup pin-dapaipa andeande' atona atin ea' pila nomonas isimba atis pese'as hiahaom. Na'amba anin epen okom iwanima negaso'as hiahawes ananisi a'a anin daian ni'i anis daias si'ipan dindinipa negaso'as na'ambai, owa'. Dei' main, God okom maimaila epes isimba sonogahasa sogaso'as hiahawasi. **8** God anen ilama nogase'epa hiahawes bu'wasi hiasi ipa' ma atiasi ipa' si'ipamas endilisi. Anen nanda'as na'amba ma nimaguf hiafi ipa' penda'as pegaso' anis daias ina atiasi hi'ilas, owa'. So'oh atapis. Ea' ipa' a' hiahaom hiamipa penda' maol bu'wani hiani naninani ma pegatopalopa anis daias wapani.* **9** Si'i Baibel na'ias naga'i, "Epen inimba naso'as hiahawes hiasi epes isimba hiahawes akasi. Ea' epes hiasi hi'alas ukup papoma waf usi'ifi hilili'i ananifi atapif."*

10 Dondol God naso'as nalelef gwa'aisi hiasi saga'asi epesa ea' naso'as gwa'aisi sasisasi hiasi epesa soga'as. Ea' bola a' nese'epa hiahaom ipa' wapani ma pegaso'asam anis epes daias. Ama hiahaom amamba ipe'imi mogataga lu'um a'owa' ma pegaso'asam wapani, si'i anin epen nagawa nalelef gwa'aisii ma a'i owa' main, nola' gwa'aisi hias a'owa' nofa'as.* **11** Atiasi ipa' a' hiahawes hiasi ma dondol la'ifipama pegaso' alipisi kwahuusi ma hiahawes hiasi. Nemaf mamahefa afa' ogofa' hiahawes isimba ipe'isi ma ogaso'assas

* **9:8** Sam 112:9 * **9:9** Ais 55:10; Hos 10:12 * **9:10** 2 Ko 1:11, 4:15

alipisi isimba, waf fasifi ipe'ifi fanda' epes sanifela God.*

¹² Ipa' penda'as na'amba ma pegatopalopa alipisi isimba amam nematawa Godi ma waf afambai, ipa' panda' maola pagatopalopa epes isimba waowaola hiahawasi. Ea' ina a' isimba atis, owa'atin. Ipa' panda' waf afambai pasa'ma epes hiasi ma sogasa'ma agol Godi soganifelona a'owa'.

¹³ Waf afambai ipe'ifi fandawalap alihigima fi-himba'ma epes hiasi ma ipa' pagaila basef Godi andeande'. Ea' anis epes daias wapani sosa'ma agol Godi lu'wagola ipa' pagaila basef bu'wafi Kraisi pawalapefa pagatopalopa esis saloma anis daias wapani hi'agalas. ¹⁴ Ea' esis atiasi ukup pelele' pipilipa a'owa' ma sondabeten a ipa'. Dei' main, esis sogawa ea' waf Godi nagatopalopepa dowafafi fape lu'wif a'owa' ma ipa'. ¹⁵ Waf afamba God nagaso'apafi, amamba lu'um a'owa'. Ea' apa' basef akapa ma mi'i basef mogonandenaefam hi'igalam, owa'atin. Apa' a' mundanifela Goda waf afamba ananifi.

10

Pol natalogofa basef awafi esis sanda'efa anini

¹ Ae' Pol ahali'ipa nimanis aila waf Kraisi sa'umbilifi si'i anen nanda' okom ananimi mogafe' lafela epes hiasi. Dei' anifelipa ma anis hiahawes atifis. Anis epes sasapagae sa'ipi na'amba sa'i, "Anen ata' nape nagaloma apa' nanda' anen nafe' sa'osa'ona nafe' lafel, apa' nogota atamba nafe' napani laogon nanda' banagafima apa!."*

* 9:11 2 Ko 8:14 * 10:1 1 Ko 4:21, 2:3

² Ae' ihali'ipa na'amba. Anaf ae' egatagamepa, ipa' solawaipa. Na'amba pasasapa'e ese'epa basef banagafi si'i ae' okom ma'l i egawalapefa anipa. Ae' ewalapefa ipa' paga'i afa' wafe' wagaila waf awafi itapafii. ³ Endilisi, afa' wape wagafe' itap apa'e, apa' ina wape wanda' wandaf si'i epes itapasi sagapa', owa'atin.* ⁴ Hiahaom hiami sagapa'ami afa' wagahapilami amom ina itapami, owa'atin. Amamba banagami Godi, la'ifimi ma migindiwa indalelemb banagami bounai Seteni. ⁵ Afa' wigindiwa nomonas epes isimba owa' endilisisia. Ea' waf hiafi fagasopama ufia'wa epes sa'i sogogawa Godi, afamba afa' windiwaf wasopamaf wapani. Ea' afa' wasindi'amona nomonas hiasi apa' epesi ma monda'as usi'is sigaila okom Kraisi.* ⁶ Afa' dumbulidombol wape ohafa ipa'. Ama i'i ipa' pigaila basef hiafi afa'ifima, dao' afa' atiasi ogwamasa akafimi awami epes hiasi sogosambala basef Godi hi'ilas.

⁷ Ipa' pati hiahaom magape naep ipe'imi atom ando' atogini, nomon owa'. Dei' piti hiahaom kofagema. I'i epen mamahina banagen niga'i anin epen Kraisi, dao' anin a' nendegawa afa' wapani wape epes Kraisi.* ⁸ Dembinai naso'afa agof lu'wagufi afa' ma onda' maol inimba ananini, amamba mogowa' banaga hapif ipe'inii. Amamba ina mohambombagepa, owa'atin. Ama ae' i'i egasa'ma agof afa'igufi atogofa maol inimba Dembinaii, atiasi ae' ina a' ambal aola isimba, owa'. ⁹ Apa' ae' andaiwa' endilisi ma ipa' pi'i

* **10:3** Ef 6:13-17 * **10:5** 2 Ko 2:9 * **10:7** 2 Ko 13:10; 2 Ko 12:6

ae' agaumbalipa dowafa anis pasa basef ifimba ae'afi, owa!. ¹⁰ Dei' main, anis epes sa'i, "Aho', pas basef ananifi nimanif a'owa' ea' banagafi ahifif a'owa'. Apa' owa' anen nafi'i natagamapa ma magatolona naep ape'ipi, ina banagona ea' basef ananifi falafifi atif."* ¹¹ Epes saga'i basef ifimbai, ata' ukup pendanda' andeande' sondogawa na'amba. Afa' wape laogon ea' wanda' basefa pas atisa ipa'. I'i afa' ope olomepa, a' onda' waf afambai atef si'i basef ifimba wanda'ef fagail pasi.*

¹² Afa' ukup hiahaop dei' wandaiwa' ma uga'i afa'wandati na'amba atin si'i epes sagasa'ma agof asasigufi atogof lu'wagufi, owa'. Epes isimba sandawaloga waf asasifi ma ikwaf ukup asasipi atip. Ea' sandawaloga atin na'amba. Esis isimbai owa' sogogawaia, ukup magahasi.* ¹³ Apa' afa' wandaiwa'ma ogatolapai ikwaf afa'ifi ma ogasa'ma agof afa'igufi ilif a'owa', owa'atin. Afa' ondaila ikwaf God nogawalogafafi ma nagaso'afa maol ananini. Afa' waila isimba ea' wafe' wataga ma ipa' wanda' maol inimba. Ea' wasa'ma agof afa'igufi ma maol inimba atin. ¹⁴ Afa' wame' basefa God wailif wafo'o watagama ipa' dondo' ma alol anen nandandepafamal afa'i. Ea' afa' ina umbisila' alola maol inimba ma wagawalip-ipa basef ananifi, owa'. I'i afa' owa' ome' basef ananifi naga'ipipafi ugi'mifa, dao'afa'a'umbisila' alol. Owa', owa'atin. Afa' wafo'o ofa'ago basef bu'wafi atif Kraisi fatagamepa.* ¹⁵ Ea' afa' ina

* **10:10** 2 Ko 13:2,10 * **10:11** 2 Ko 3:1, 5:12 * **10:12** Ro 12:3

* **10:14** Ro 15:20

umbisila' alola ogasa'ma agof afa'igufi atogofa anin maol anis epes daias sanda'ani, owa'atin. Afa' ukup pandanda' pafe' banagep na'amba. Maol inimba afa' wanda'ani, ipa' atiasi pihapifa Krais banagepa pikila' fowa' pali' pagahapifana ma negataga lu'win la'afena ipa' nigikila' fowa'ini. Afa' wa'i onda'an dondol nendahama ikwaf God nagaso'afafi.* ¹⁶ Wa'ias na'amba ma afa' ata' ogofa'basef bu'wafi Godi ogafo'o laogon anep itap pagape alafugaha ipa' ganimba wa'ili. Ama afa' ina umbisila' ofe'ma maol anona amani osa'ma agof afa'igufi dowafa anin maol aman anamba nanda'an ea'i, owa'!*

¹⁷ "Epen sonogahani anin a' nendagala ma Dembinai atona."*

¹⁸ Dei' main, apa' mogawa epen mamahina negasa'ma agol ananigili atigili, anin agol akana naep Dembinai, owa'atin. I'i Dembinai nogasa'ma agol anin epeni, dao' epen inimba atin nefo' agol endilisi.

11

Pol nawalapa wafbaso'afi amom aposel magambaso'ami

¹ Ae' a'i ipa' pekwhaha ae' ma ata' enda' anif basef falafalafifi kwasakwasala. Aho', ipa' ata' kwahowae.* ² Dei' main, God okom ma'ima'i epes a'owa' ma na'i nondandepasa sogape ananisi atis. Ama waf afambai atef ae' okom ma'ima'i ipa' a'owa'. Aho', ae' andandepepa ea' ma pegaso' anona aman atotona, anen Krais. Ae' a'i

* **10:15** Ap 19:21 * **10:16** 1 Ko 1:31 * **10:17** 1 Ko 4:4-5 * **11:1**
Ef 5:26-27

ese'epa pefe'ma anen si'i nemata'w aiawai'wi kwagape bo'okw endilisi.* ³ Apa' owa' ae' ombal mahe. Na'amba ukup ipe'ipi a' awep ea' pekwha waf afamba pegape hilili' nomonas sogapoma Krais atona si'i fowa' gani ul anamba gawainai nagambaso'ma Iv.* ⁴ Dei' main, anis epes safi'i satagama ipa' sawalapa basefa anona Jisas daiana, anen ina Jisas anamba afa' wawalapa basef waga'ifani, owa'. Ea' ipa' dei' apefa' anona spirit ambal daiana, ina Ambal bu'unai Godi fowa' ipa' pegefa'ani, owa'. Ea' ipa' apefa' anif basef daif, ina basef ifimba bu'wafi Godi pagame'ef ea' ma afa'i, owa'. Epes isimba safi'i sambaso'mepa sa'i anif basef daifa anona Jisas daiana la'afena ipa', ea' pa'i aho'ma epes isimba pandagalamas pa'i basef ifimba bu'wafi.*

⁵ Peme'! Ae' ina okom mandanda' a'i ae' gawa ake ape lafela amom "Aposel amamba ipe'imi magali'i," owa'atin.* ⁶ Endilisi ae' ina egawa a'owa' ma waf afamba egawalapa basefafi, owa'. Apa' ea' hapaini, gawa ae'ani ma basef Godi ina bandan, owa'. Nimaguf hiafi ma waf hiafi afa' wanda'afi wihibma'mepa gawa inimba hiani ma ipa'.

⁷ Ipa' pegawa afamba ae' awalapa basef bu'wafi Godi ma ipa', ina efa' anemba otamba ma isimba, owa'. Anda' waf afamba atalifa ae' afa' lafela agasa'ma ipa'. Dei' main? A'i waf afamba anda'afi awafi a'a? Owa'atin.* ⁸ Ae' efa' moni maisa anis Kristen sios sagape anagon daiagini satopalope

* **11:2** Jen 3:4,13 * **11:3** Ga 1:8-9 * **11:4** 1 Ko 15:10; 2 Ko 12:11; Ga 2:6 * **11:5** 1 Ko 2:1,13; Ef 3:4 * **11:6** 1 Ko 9:12,18

* **11:7** Fl 4:15-18

anda' maola egatopalopepa. Waf afambai si'i egefa' hiahawes asasisi dowaf.* ⁹ Fowa' ape agalomepa ata' waowaola hiahawes, nogota atamba ae' ina ahali'ipa ma hiahawes isimba, owa'atin. Dei' main, amom alipumi makwaha itap lu'upa Masedoniai mafli'i matagamepa muwapanimi hiahawes isimba ae' waowaolasi. Ea' ina ahali'ipa kwasakwasala ma pagase'e otamba mais, owa'atin. Ea' atiasi wapani enda'as na'amba atin ina ihahali'ipa ma anis hiahawes, owa'atin.* ¹⁰ Basef endilisifi Kraisi fape ae', isimba endilisi atis. Ea' anif basef wapani endilisifi atif, ifimba na'amba. Anamba hiagoma esis Grik sagapoma ina atiasi anona aman atotona la'ifina ma nogafeha ufia'wa ae' egasa'ma agol ae'agilima waf afamba egefa' otamba maisa ipa', owa'atin. ¹¹ Pa'i ae' asa'ma agol ae'agili na'amba ma main? Asa'ma agola egapa'aga ipa'? Owa'atin. God nogawe ea', okom ae'ami maimailipa.

¹² Apa' anom amam ma'i molaoma ufia'wa mogasa'ma agof amamugufi atogofa ma'i mogataga na'amba atin si'i afa' ma naep epesi. Ea' anda' maola agasopama amoma ufia'w akwamba. Ae' atiasi enda'am na'amba atin epe.* ¹³ Amom amamba aposel magambaso'ami manda' maol baso'aminii. Amom mondola'waifa amom aposel Kraisi dowaf, owa' magambaso'ami. ¹⁴ Ea' ipa' ina pesafel gogolalasipa ma amamba, owa'i. Apa' mogawa Satan atona nondola'waifa ensel nogogala'i nagafe' hiagoma. ¹⁵ I'i amom manda'

* **11:8** 2 Ko 12:13 * **11:9** 1 Ko 9:15 * **11:12** 2 Ko 2:17; Fl 3:2

maol ananinii wapani mondola'waifa sanda'
 maol bu'wani waf fasifii, inimba ina anin mae
 lu'wani, owa'atin. Anaf amom a' mofa' akafimi
 awami mondahama maol amamini.*

Pol nofa' nimanimi hiami ma maol aposeli

¹⁶ Doko' ali' a'ias, dei' a'ias wapani a'i anin epen
 ina a' okom mondanda'ma ae' ni'i ae' okom magahai, owa'. Apa' dei' ae' a'i ipa' ata' pi'i aho'me
 i'i basef si'i epen okom magahani. Pi'i aho'me
 esa'ma agol ae'agili sonehe kwasakwasala. ¹⁷ Ae'
 ina aila Dembinai a'i basef ifimba, owa'atin. Ae'
 a'i si'i ukup pagaso'asi ma banagewe egasa'ma
 agol ae'agili atogol. ¹⁸ Epes hiasi saila waf ita-
 pafi sasa'ma agof asasigufi atogof, ea' ae' a'i
 enda'as wapani. Dei' i'ipipa anif basef si'i epen
 okom magahani. ¹⁹ Ipa' hipai gawaipai atipa.
 Ea' ipa' ukup pehafel a'owa' pa'i aho'ma esis
 ukup pagaso'asi sagase'epa basef putuputa'afi
 ipa'. ²⁰ Endilisi, ipa' ina pa'i aho'ma esis isimba
 ukup pagaso'asi atis, owa'. Ipa' pa'i aho'ma amam
 mamahoma mogambaso'ami mafi'i mahokolepa
 pagafe' lafela amom. Amom mogofa' hiahawes
 hiasi ipe'isi masa'ma agof amamugufi atogofa
 mopa'agaipa ma mogopagaha amagah ipe'igahi.
 Amom manda'epa na'amba dei' pa'i aho'mam.*
²¹ Amom manda' waf awafi fikila' afa'. Ea' afa'
 ina banagefa onda' waf afamba amom manda'afi,
 owa'atin.

Dei' ae' ata' i'i basef si'i epen okom magahani. I'i
 anin epen banagena negasa'ma agol ananigili ato-
 gola, ae' wapani na'amba atin. ²² Amom Hibruimi

* **11:15** 2 Ko 12:6 * **11:20** Fl 3:5

ma, ae' wapani. Amom amam Israeli ma, ae' wapani. Amom wambota Abrahama, ae' wapani.*
23 Ae' dei' aga'i si'i epen okom magahani endilisi. I'i monda' maol Kraisi ma, ae' wapani anda' maol Kraisi ikila' amam. Ahifimi numa'umi, amamba ae' ikila' amam ea' kalabus wapani anda' kalabus ikila'am. I'i anis epes sogaham hihif a'owa', isimba wapani ikila'am endilisi. Nimaguf hiafi ae' felefele' ma egaga!.* **24** Wanif bif Juda sahe wip banagambel hiafi timbi tambel 39-pelaif.*
25 Nimaguf wanif sahe melu'uta. Anef nemaf sahe otamba. Galahowa awasiwa wanif ea' aowe naoh embel. Ea' nemaf si'ifi atetef owamb si'imb atotomb ae' alemb ala naoh embella'afen.* **26** Dondol ae' agafe' lauguni ufla'w lau'wi. Ae' a'i higilili ewala walembbeh. Amom amamba manda' waf awafi manda' wali magafe' ufiawai ma'i mehe. Esis asimbel atembel Judaisi sa'i sohambombage ea' epes isimba owa' Judaisia wapani sa'i sonda'e aowe. Anis epes sa'i sonda'e aowe taun ea' anamba itap wafigima wapani, naoh embel wapani. Ea' anom alipumi magambaso'ami wapani ma'i mohambombage.* **27** Ae' anda' ahifimi hiami mamimami endilisi. Owambeh hiembihi danda ina a'oma ambeh, owa'atin. Nimaguf hiafi ina a' anis gwa'aisi embel mais, owa'. Iap pase'e nolomahe a'i ega' atin. Anif nimaguf daif hiafi elelama gwa'aisi, luwaguf mais ake nomanamb bae.*

28 Ea' ina a' isimba atis, owa'atin. Nimaguf

* **11:22** Ap 16:23; 1 Ko 15:10 * **11:23** Diu 25:3 * **11:24** Ap 16:22, 14:19 * **11:25** Ap 9:23, 14:5 * **11:26** 1 Ko 4:11; 2 Ko 6:5

* **11:27** Ap 20:18-21,31

hiafi ae' nomonas salasafe' hiahiasa esis Kristen hiasi sagape hiagomai sape sa'imama? Sahapi-fana banages, a'a owa'!*²⁹ Epen mamahina owa' banagena, ae' wapani ina ame' banagewe. Ea' epen mamahina newa ma waf awafi, ae' wapani ame' akafimi aloman.*

³⁰ I'i ae' egasa'ma agol ae'agilima, esa'magola hiahawes mais sihimba'mepa sawalapa ae' owa' banagewea.* ³¹ God, anen God Dembinai Jisasi Ahamana wapani, apa' mondasa'ma agol ananigli lifilafi! Anen nogawa basef ifimba doko' ali' aga'ieffi ina ambaso'am, owa'atin.* ³² Fowa' wambel Damaskus, dembinai gavman nagape lafela dembinai king Aretasi anen nanda' amom malutu mugumafi uta indalelemb sagawis taun Damaskusi. Anen na'i nombale'e. ³³ Owa' anom alipumi mafi'i manda'e atolo'w folaf malae iwalai uta sa'utai indalelemba taun inimba ando'. Isimba atis dei' akwaha lagof gavman anambai ea' afa' afe'.

12

Koh dahembe' God nihimba'ma Pol basef hiafi

¹ Ina ano'w ufia'w daia'w, owa' ae' endasa'ma agol ae'agili atogol wapani. Anda'as na'amba ina la'ifisa sogatopalopapa, owa'. Apa' diaogo, ae' endanda'as. Dei' ae' a'i i'i basefa anin koh dondo'aha basef fape fandambahi'i God nagawalapamef ae'i.
² Ae' egawa anona aman Kraisi, basef ananifi fagaape na'amba. Fowa' afagof 14-pelaiguf fafe'ma

* **11:28** 1 Ko 9:22 * **11:29** 2 Ko 12:5 * **11:30** 2 Ko 1:23

* **11:31** Ap 9:23-25

ea', God nofa'ana nalota heven nagafe'ma wanifigini gani ilif. Anen nani ambal atol lalota a'a naloma alop nalota, ina egawana. God atona nogawana. ³ Ea' ae' egawa aman anamba God nofa'ana nalota heven. Anen nani ambal atol nalota a'a alop papaona nalota ae' ina egawana, God atona nogawana. ⁴ Gani heven anen name' basef hiafifafifi epes owa' la'ifisa siga'if digaia God nandaiwa' ma epes sogawalapefia.* ⁵ Ae' a'i esa'ma agol aman anambai lu'wagol. Apa' agol ae'agili owa'. Ae' i'ias i'i ae' owa' banageweа, ea' isimba atis esa'ma agol ae'agili.* ⁶ Endilisi, i'i ae' i'i esa'ma agol ae'agili atogolai, ae' ina si'i epen okom magahani, owa'atin. Dei' main, atiasi i'i endilisi atis. Apa' owa', owa'atin. Ae' andaiwa'. Na'amba anin epen ni'i ae' epen bu'uwal a'owa' ikila' waf fe' poe ki ae'ani. Ae' a'i ipa' piti waf ae' anda'afi peme'e ma basef ae' aga'iefi. Ea' na'amba atin ipa' pegawa waf ae'afi andeande!*

Hiahaom si'i higatai mape alop Poli

⁷ Basef ifl'i God nighimba'mef ae'i lu'waf a'owa' endilisi. God nandaiwa'ma egasa'ma agol ae'agili a'owa'. Isimba atis dei' nase'e anom hiahaom si'i higatai mape alop ae'api ame' akafimi, amamba anona ensel Satan nasapa'ana nagafii ma nogase'e akafimi ae'. Amamba magatalogofa ae'i ma ina asa'ma ae', owa' owa'atin. ⁸ Ae' andabetena Dembinai wanifa anen ata' negelefata hiahaom amamba ma ae'*. ⁹ Owa' anen na'ipi na'amba na'i, "Ae' atopalopena dowaf, waf

* **12:4** 2 Ko 11:30 * **12:5** 1 Ko 10:8; 1 Ko 11:16 * **12:6** Jop 2:6

* **12:8** Fl 4:11-13

afamba banagefa ina'. Dei' main, banagami ae'ami amamba manda' maol banagambel endilisi ma epes owa' banagasia."

Ea' ae' dei' ina ata' okom iwanim, owa'atin. Ae' sonahe a'owa' ma amamba ma banagami Kraisi mogapaowe. ¹⁰ Isimba atis dei' maol inimiba Kraisi atin, ae' ina banagewe, owa'. Esis sanda'me waf awafi ea' sanda'me nimanimi mamimami hiami, anis sahambombage. Ea' hapaimi. Ae' andagala ma hiahaom amamba. Aho' afamba ae' owa' banagewe, nogota atamba ae' banagewe endilisi.*

Pol na'i nowa' banaga hapifesi Korini

¹¹ Basef ifimba ae' aga'iefi ifimba basef putuputa'afi a'if si'i epen okom magahani. Apa' ipa' pesa'ma ae' dei' a'if na'amba. I'i ipa' pasa'ma agol ae'agiliea, afamba waf usi'ifi. Apa' owa', owa'atin. Endilisi ae' epen falafuwai, apa' ina afe' lafela amom amamba "aposel ipe'imi" magali'i, owa'atin.* ¹² Ae' ewa' banaga okom ae'ami anda' numa'umi hiami la'afena ipa', awalapai ametal hiani aposeli. Amamba na'amba. Banagami si'i God nanda'ami mataga hiami mamimami la'afena ipa' mandahama maol Godi. Sati banagami amamba, esis bolalas kwapete'as. Banagami amamba mihimba'mepa ae' aposel endilisiwai.* ¹³ Ipa' ina pape lafela anis Kristen sios sagape ganiganii, owa'. Ipa' palomas pape dondo' atina waf hiafi ae' anda'mepafi. Apa' anef waf awafi anda'mepaf ipa' atipai ma esis

* **12:10** 2 Ko 11:5 * **12:11** Ro 15:19 * **12:12** 2 Ko 11:9

owa'i, afamba na'amba. Ae' ina endelaepepa anis hiahawes ipe'isi, owa'atin. Dei' ae' a'i uwahipigai, ipa' ukup pese'epa waf afamba awafi anda'mepafi pekwahomeaf.*

¹⁴ Dei' anda'as dumbulidombol efe'mago ipa' ma a' wanif ea' ae' ina atiasi ehendo' hiahawes ipe'isi, owa'. Dei' main, ae' andaiwa'ma egefa' hiahawes ipe'isi, owa'. A'i ifa'ai ipa' atipa. Ipa' pegawa ipa' si'i batawis. Ina andeande'ma esis awasi sogolaoma hiahawes sokolasis sogatopalopa mamasas asasisi, owa'atin. Esis mamasas atis dao', sanda' maol solaoma hiahawes sakolasis satopalopa batawisas.* ¹⁵ Ae' okom ma'ias a'owa' ma egakwaha hiahaom hiami ae'ami ea' elelama ambal ae'ali wapani ekwahola egatopalopepa. Ae' okom ma'i na'amba. Waf ae' okom magamagailipamafi fataga fape lu'ufa a'owa' atapif fikila' fowa'. Apa' waf ipa' ukup pagailimafi afewala sa'osa'of a'owa' atapif fape.

¹⁶ Ea' ipa' pegawa fowa' ae' ina ase'epa nimanimi ipa', owa'atin. Apa' anis saga'i na'amba sa'i, "Endilisi anen ina nofa' hiahawes ape'isi alihis, apa' anen aman nanda' kikipai ma waf baso'afi nasapagapa nahokolapa."

¹⁷ Endilisi fowa' asapa' anom amam mafe'mago ipa'. Dei' si'i main? A'i ae' ambaso'mepa ahondo' anin mae ma lagof ipe'igufi? Owa'atin.*

¹⁸ Ae' asa'ma Taitus nafe'mago ipa'. Ea' asapa' owamapa anamba nafo'o nalomanago. A'i Taitus nambaso'am nahondo' hiahawes ipe'isi a'a owa'? Owa'atin endilisi. Afa' dei' wafe' banagami waf

* **12:13** 2 Ko 13:1 * **12:14** Fl 2:17 * **12:17** 2 Ko 8:6,16-18

bu'wafi ukup atifip. Ipa' pegawa afa' waila ufia'w atoto'w wafe'.

¹⁹ Ipa' ina pi'i afa' wanda' basef ifimba hiafi wali' waga'iefi onandonwa waf afa'ifi ma naep ipe'ipi, owa'. Afa' wape epes Kraisi wanda' basef ifimba ma naep Godi. Alipipai endilisi ae'ipai, afa' wanda' basef ifimba hi'alefa fegewa' banaga hapif ipe'ini.* ²⁰ Ae' ombel mahe kwasakwasala ea' a'ias na'amba a'i atiasi efo'o etaga ma igatilipa ina atiasi pepe be'epa si'i okom ma'i efo'o iti ipa' pindati, a'owa'. Ea' ipa' wapani atiasi pigati ae' ina epe fasiwi si'i pa'l'i piti ae' indati, a' owa'atin. Na'amba waf naninani hiani na'ambainai a' nope. Basef lopa' fitapafi, waf kowagalasafi, migimigah, findiwa, da'l'i'ipama, du'wanigama waf pendatopa' biafipamafi. Ea' ipa' ina pegehembe' ande-ande'ma pigaila okom atotoma waf sanda' lotuwafi, owa'. Paila ukup daindai. Ae' ombel mahema amamba.* ²¹ Na'amba ae' efe'mago ipa' owa', God ae'ani notalogae ma nogohnaep ipe'isi ma agalopa ipa' amam nematawa hipai fowa'panda'waf awafii owa' pembema nelelemb pegafe'ma Godia. Ma ipa' owa' pewa' alafugaha waf alugufi awafii so'a waulafi a nelelemb usiusihilimbi soloma hiahaom awami fowa' pali' panda'ami. Ae' ombal mahema amamba.

13

Esis Korin sundumafi hapif asasini andeande

¹ Atiasi ae' efe'mago ipa' ma ea' wanif. "I'i anis epes sogasapaga anin epena anif basef, ama

* **12:19** 2 Ko 2:1-4 * **12:20** 2 Ko 13:2

i'i anis daias bias a'a wanis si'i basef atififa waf afamba, dao' ea' basef ifimba sagasapaganafi endilisifi atif."*

² Fowa' ae' ali' afo'o bif ape agalomepa, ae' a'ipa anipa dindinip a'ias na'amba a'i, "Ipa' solawaipa."

Dei' ape laogon a'ipipago wapani na'amba a'i afamba ae' egafo'o wapanima, ina atiasi iti anis soloma ipa' pali' panda' waf awafii i'i bu'upai, owa'. Ewalogepea isindi'amonepa banagambel.

³ Nemaf afamba atef ae' egawalipipafi ipa' a' pegawa endilisi si'i Krais na'i basef fagataga malogol ae'agili. Ipa' a' pegawa endilisi atis. Krais ina pupulina ma nanda' maol nagalomepa, owa'atin. Anen banagonai.* ⁴ Endilisi, fowa' anen ina banagona a'owa' ma dei' sagandolana lawag usi'igai ti'wanaegai sahana nagaga', owa'. Apa' owa' banagami atom Godi NASA'mana dei' nape namona. Afa' wandaloma walomana ea' afa' wapani owa' banagefaea. Owa' banagami atom Godi dei' afa' wape namofa walomana ea' atiasi ovalapa banagami amamba la'afena ipa'.*

⁵ Ipa' dondol ata' pewawalogia opalef ipe'ilifi pegawalef andeande', ipa' pahapifa God endilisi a'a owa'atin? Ipa' pendawawalogia ipa' atipa. Ipa' pegawa Krais Jisas nape opalef ipe'ilifi a'a owa'atin? I'i ata' owa'atin, ikwaf ipe'ifi ina dei' pafe' dondo', owa'. Ata' waowaol. ⁶ Ae' egawa a'i dei' ipa' pegawa ikwaf afa'ifi ina fafe' waowaol, owa'atin. Fafe' fataga dondo'. ⁷ Dei' afa' wandabetena God nogatopalopepa ma ina penda' anef waf awafii, owa'. Afa' ina wandabetena ipa' na'amba ma

* **13:1** 2 Ko 12:14; Mt 18:16; 1 Ti 5:19 * **13:3** Fl 2:7-8 * **13:4**

otaga ondawalap alihifa ma nogohnaep epesi ma siga'i ikwaf afa'ifi dondo', owa'atin. Afa' wanda'ana ipa' penda' waf bu'wafi hilili', apa' afa' ea' hapaifai. Afa' wandawalap alihifa ma nogohnaep epes hiasi sambaso'am sa'i ikwaf afa'ifi ina fafe' fataga, owa!. Afafe' waowaol.* ⁸ Ipa' pegawa afa' ina onda' anin mae ma negatalogofa basef endilisifi, owa'atin. Afa' la'ififa ma wanda' maola ogatopalopa basef endilisifi atif. ⁹ Nemaf mamahefa afa' wagame' pupulifa ma ogatopalopepa pegape banagepa, dao' wa'i aho' wandagala a'owa!. Afa' wandabeten dondola Goda ipa' pegataga banagepa be'epa hilili' endilisi.* ¹⁰ Dei' ape laogon anda'ago basef ifimba fafe'mepago ma main? Ae' anda'as na'amba ma atiasi efo'o epe egalomepa ae' ina i'ipipa banagambel a'owa' ma banagami Dembinai nagase'eami, owa!. Banagami amamba anen ina nase'eam ma mogahambombaga ipa', owa'atin. Amamba mogowa' banaga hapif ipe'ini.*

Anifbasef du'wanif

¹¹ Kristen alipipai, dei' esopama basef hi'ilif a'i endagala inifelipa. Ipa' pendanda' maol banagepa endilisi ma pegataga be'epa hilili'. Ea' pendame' basef ae'afi. Ipa' pindahapila nomonas atifis ea' pendape opalef atifilif awanelef. God, anen kofagonama waf ukup pagapagailasafi faloma opalef awanelefafi nope nolomepago.*

* **13:7** 1 Ko 13:6 * **13:9** 2 Ko 2:3, 10:8 * **13:10** Ro 15:33

* **13:11** Ro 16:16

12 Waf ape'ifi amam nematawa hiapai atona
atin Godi, pendaso'ama lagof pelomago esis alip-
isi. **13** Amam nematawa hiasi Godi sanda'mepago
nemaf bu'wafi ipa'.

14 Ae' a'i Dembinai Jisas Krais niti uwahipipa no-
topalopepago dowafa okom Godi mogomogailipa.
Ea' a'i Ambal bu'unai ananinai nope noloma ipa'
hipaii hi'ilipa ma pelomana opalef atelef pegape.
Ea' ma'uf.

**Basef Bu'wafi Godi
The New Testament in the Mufian Language
Nupela Testamen long tokples Mufian long Niugini**
copyright © 1998 Wycliffe Bible Translators, Inc.

Language: Mufian

Dialect: Mufian

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-19

PDF generated using Haiola and XeLaTeX on 21 Feb 2024 from source files
dated 31 Aug 2023

b0cff915-4005-598f-9bbc-38b1e35d47b1